



Komunikadu Imprensa
18 Maiu 2023

JSMP dezamina informasaun kona-ba prosesu justisa formál no fasilita dialogu entre estrutura suku no comunidade suku Ogues ho autór judisiáriu

Iha 11 no 12 Maiu 2023, JSMP halo dezaminasaun informasaun kona-ba prosesu justisa formál no mós fasilita dialógu entre autór judisiáriu ho autoridade lokál no comunidade Suku Ogues, Postu Administrativu Maukatar, Munisípiu Covalima. Atividade ne'e partisipa husi estrutura suku, lia-na'in suku, lia-na'in aldeia, lia-na'in uma lisan, representante fetu no mane, fetu potensial suku, kableha, membru LGBTI, ema ho defisiénsia no comunidade sira.

Iha loron primeiru, JSMP fahe informasaun espesífiku kona-ba definisaun lei no krime, natureza krime no oinsa atu lori kazu sira ba iha prosesu justisa formál no mós tipu pena sira. Partisipante ne'ebé partisipa iha atividade ne'e hamutuk na'in 47 kompostu husi fetu na'in 14 no mane nain 30 inklui membru LGBTI na'in 1 no defisiénsia nain 2 (rua). Enkuantu iha loron segundu dialógu entre estrutura suku, comunidade no autór judisiáriu ne'ebé partisipa husi ema hamutuk nain 40 kompostu husi fetu 11 no mane nain 29.

“JSMP apresia tebes ba apoiu husi autoridade judisiáriu iha Munisípiu Covalima tantu husi parte Tribunál, Ministériu Públiku no Defensoria Públiku tanba bele kontribui ona ba prosesu ida ne'e hodi ajuda JSMP hasa'e estrutura suku sira nia koñesimentu kona-ba prosesu justisa formál ne'ebé ho objetivu bele asegura bainhira rezolve disputa entre comunidade liuhusi justisa komunitáriu, la kontradiz ho lei nasional,” dehan Sra. Ana Paula Marçal, Diretora Ezekutiva JSMP.

Iha sesaun loron dahuluk, depoisde rona tiha JSMP nia esplikasaun kona-ba prosesu sira iha justisa formál no dezaminasaun informasaun husi JSMP, partisipante balun kestiona tanba sa la'en ho feen halo relasaun seksuál kuandu obriga ne'e krime, afinál tuir sira katak ne'e asuntu ne'ebé normal akontese iha família ida nia laran no feen iha obligasaun atu sempre atende nia la'en. Hatan ba situasaun ida ne'e, JSMP esplika katak iha Lei Nú. 07/2010 kona-ba Lei Kontra Violénsia Doméstika deskreve bainhira fe'en ka la'en kuandu obriga halo relasaun seksuál ne'e tama ba kategoria krime violasaun seksuál ho natureza violénsia doméstika tanba ho konsiderasaun ema se deit iha direitu atu fó nia konsentimentu ba halo relasaun seksuál mezmú ne'e entre feen ho la'en.

Parte seluk, partisipante sira mós husu kona-ba oinsá joven mane ida halo tiha koasaun seksuál ba fetu ida, maibé kuandu sira decide rezolve iha justisa komunitáriu no mane deklara hakarak atu hola fetu ne'e no taka tiha prosesu ne'e, lei fó dalan ba ida ne'e ka la'e. Hatan ba pergunta ne'e JSMP esplika katak tuir artigu 171 Kódigu Penál (KP) kona-ba krime koasaun seksuál, la fó fatin atu autoridade suku sira taka nune'e prosesu tenki lori kedan ba justisa formál, mezmu nune'e bainhira parte rua konkorda bele rezolve iha justisa komunitáriu.

Entretantu iha diálogu entre autór judisiáriu ho estrutura suku no comunidade, representante Diretora Ezekutiva JSMP, Sr. Jose Moniz iha nia intervensaun agradese tebes ba autoridade judisiáriu tanba bele fó tempu hodi partisipa iha dialógu refere hodi bele rona direta preokupasaun ka dúvida husi estrutura suku no comunidade suku Ogues kona-ba prosesu sira iha justisa formál ne'ebé durante ne'e sira hasoru.

Parte seluk, Xefi Suku Ogues Sr. Faustino de Araújo iha nia intervensaun hateten nia parte sente haksolok tebes tanba JSMP hamutuk ho *The Asia Foundation* bele kria eventu importante ne'e hodi fasilita sira nia estrutura suku no comunidade hasoru malu direta ho autór prinsipál sira husi tribunál hodi tulun sira bele hatene ho di'ak liu prosesu sira iha justisa formál nune'e sira labele la'o sala dalan bainhira rezolve disputa sira iha comunidade.

Meritísimu Juis Administradór Primeira Instánsia Suai, Dr. Jose Maria de Araujo deklara katak nia parte apresia ba inistiava JSMP nian hodi bele realiza dialógu sira ne'e tanba iha prosesu justisa formál la'os deit julga ema iha tribunál, maibé importante hasa'e koñesimentu comunidade sira nian kona-ba prosesu ne'e rasik hodi bele evita comunidade sira husi krime no mós tulun estrutura suku bele rezolve disputa uza lisan maibé la kontráriu ho lei.

Kestaun hanesan hato'o husi representante Xefi Prokuradór Distritál Suai, Dignísimu Prokuradór Dr. Rafael Jeronimo Gusmão iha nia intervensaun katak, tuir loloos sesaun dezaminaun informasaun sira ne'e partense mós ba kna'ar ministériu públiku nian maibé tanba menus ba rekursu nune'e sira apresia ba JSMP ho TAF bele fasilita hela sesaun sira hanesan ne'e hodi bele tulun comunidade sira hatene di'ak liu prosesu sira iha justisa formál.

Entretantu Representante TAF ba programa PASK, Sra. Hilde Gardis Wondeng hateten sesaun dialógu ne'e hanesan programa ne'ebé inklui ona iha akordu ba intendimentu ne'ebé realiza ona entre JSMP ho suku Ogues hodi tulun estrutura suku sira bainhira rezolve disputa sira labele kontráriu ho lei formál sira. No apoiu sira ne'e sei kontinua iha futuru ho programa seluk tan kona-ba kapasitasaun no asisténsia sira iha prosesu rezolve disputa sira.

Iha dialógu ne'e, Meritísimu Juis, Dr. Jose Maria hatan ba estrutura suku no comunidade sira nia preokupasaun kona-ba krime ho natureza violénsia doméstika balun ne'ebé parte sira ejije atu taka depoisde dame malu iha justisa komunitáriu,

katak Lei Kontra Violência Doméstica la fó dalan, nune'e husu atu tenke kuidadu tanba dame malu sira iha justisa komunitáriu ho sentidu atu tulun halo kmaan deit arguidu iha prosesu justisa formál. Meritísimu Juis mós hatan ba preokupasaun kona-ba kazu divórsiu ne'ebé abandona oan, katak lei mós bandu kona-ba abandona oan nune'e iha prosesu justisa komunitáriu tenke asegura mós labarik sira tenke hetan alimentasaun husi inan no aman tuir sira nia kapasidade.

Enkuantu kona-ba prosesu indemnizasaun iha kazu sira divórsiu no mós krime sira ho natureza ofensa korporais no ka violência seksuál, juis ne'e apela katak estrutura suku no lia-na'in sira tenke asegura katak indemnizasaun tenke fó ba parte ne'ebé sai vítima tanba sira mak sofre ba aktu sira ne'e. Tanba se fó fali ba família, no bainhira prosesu lori ba justisa formál, Tribunál sei obriga arguidu sira atu fó indemnizasaun ketak tan ba vítima no la sura ho indemnizasaun ne'ebé mak nia fó ona iha justisa komunitáriu. Ikus, hatan ba preokupasaun parte sira nian kona-ba iha família balun ne'ebé koko fahe sira nia oan ho nia família ((hafahe feen ho la'en) depoisde mosu violência, Meritísimu Juis esplika katak ida ne'e lei bandu tanba buat ida hola malu ne'e feto ho mane mak deside tuir sira nia hakarak perante sira nia idade to'o ona.

Entretantu, Dignísimu Dr. Rafael Jeronimo Gusmão iha nia intervensaun kona-ba problema sira aman nega oan husi feto ne'ebé isin-rua, hateten katak problema ne'e bele lori ba Ministériu Públiku hodi prosesu kona-ba investigasaun ba paternidade liuhusi teste DNA ne'ebé mak agora dadaun serbisu hamutuk PSIC nune'e se prova duni katak mane ne'e labarik nia aman, entaun sei hahú ho regulasaun ba paternidade.

Enkuantu kona-ba kazu hadau malu rai, Dignísimu prokuradór hatan katak ida ne'e bainhira la hetan solusaun iha justisa komunitáriu, autoridade suku sira bele lori kedan prosesu ne'e ba iha defensoria públiku ka advogadu sira hodi halo mediasaun no ka lori ba prosesu sivil.

Realizasaun ba dezaminasaun informasaun ne'e hanesan parte ida husi Akordu Memorandu ba Intendimentu entre suku Ogues ho JSMP iha programa apoiu ba justisa komunitáriu.

Programa Apoiu Seguransa Komunitariu (PASK) nu'udar serbisu hamutuk entre JSMP ho The Asia Foundation (TAF) ne'ebé finansia husi Embaixada Nova Zelandia hodi halo peskiza kona-ba oinsá efeitu husi justisa komunitáriu ba rezolve disputa sira iha comunidade.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>

